



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

„იმერი“

„იმერი“ (სააქციო საზოგადოება), ერთ-ერთი უძველესი სამკერვალო კომპანია საქართველოში. 1928 წ. 16 სექტემბერს სამკერვალო სახელოსნო „მაკრატლის“ ბაზაზე (მდებარეობდა ა. წერეთლის ქ. N2) დაარსდა ქუთაისის N4 სამკერვალო ფ-კა. 1935 წ. აშენდა ფკის ახ. შენობა გეგუთის ქუჩაზე (ახლანდ. ლ. ასათიანის ქუჩა), ხოლო ძვ. შენობაში გაფართოვდა ინდივიდ. დაკვეთის საამქრო, რ-იც მომსახურებას უწევდა დას. საქართველოს მომხმარებლებს. ამავე წელს ფ-კას ეწოდა ს. მ. კიროვის სახელი. წლების განმავლობაში მის ბაზაზე შეიქმნა არაერთი ფილიალი (გესტაფონი, ჭიათურა, ზუგდიდი, ალპანა, ტყიბული), რ-ებიც შემდეგ დამოუკიდებელ საწარმოებად ჩამოყალიბდა.

II მსოფლიო ომის შემდგომ პერიოდში ფ-კაში არაერთხელ ჩატარდა წარმოების გაფართოებისა და ტექ. გადაიარაღების სამუშაოები, აითვისეს და გამოუშვეს მრავალი ახ. მოდელი. 1968 ივლისში ჩამოყალიბდა ს. მ. კიროვის სახ. ქუთაისის N1 საწარმო-სამკერვალო გაერთიანება, რ-შიც შევიდა ქუთაისის (სათავო საწარმო), გესტაფონისა და ჭიათურის სამკერვალო ფ-კები. მოგვიანებით (1979) მათ შეუერთდა ლენტეხის ახლად დაარსებული სამკერვალო ფ-კა. საწარმოში იკვრებოდა მამაკაცის, ქალისა და ბავშვის პალტოები, შალის, ბამბისა და ჰინსის შარვლები, ტყავის შემცვლელისგან – ქურთუკები და სხვა სამკერვალო ნაწარმი, რ-ებიც საქართველოს რნების გარდა იგზავნებოდა მოკავშირე რესპუბლიკებში, საექსპორტოდ კი – კუბასა და მოზამბიკში. ფ-კა მარაგდებოდა როგორც ადგილობრივი, ასევე მოკავშირე რესპუბლიკების და საზღვარგარეთის საწარმოებიდან შემოსული ქსოვილითა და სხვა დამხმარე მასალებით.

გასული საუკუნის 90-იან წლებში, ქვეყანაში განვითარებული მძიმე პოლიტ. და ეკონ. მდგომარეობის მიუხედავად, ფ-კას ფუნქციონირება არ შეუწყვეტია. 1990-იდან, საწარმოო

გაერთიანების დაშლის შემდეგ (1989), ფ-კას ეწოდა ქუთაისის სამკერვალო ფ-კა „იმერეთი“, 1994-იდან ჩამოყალიბდა როგორც სააქციო საზ-ბა, სამკერვალო კომპანია „იმერეთი“, ხოლო 2000-იდან კვლავ შეეცვალა სახელი და დაერქვა „ი.“

საწარმო მთლიანად ქართ. კომპანიაა. აღჭურვილია მსოფლიოს სხვადასხვა ქვეყნის (გერმანია, იაპონია, იტალია, ესპანეთი) ცნობილი ფირმების თანამედროვე მანქანა-დანადგარებით. ორიენტირებულია ძირითადად ქალისა და მამაკაცის ტანსაცმლის კერვაზე. გამოშვებული პროდუქციის მნიშვნელოვანი ნაწილი გადის ექსპორტზე დას. ევროპის ქვეყნებში. „ი.“ თანამშრომლობს გერმ. კომპანია „ლებეკთან“ (1997-იდან), რ-იც მის ერთ-ერთ უმსხვილეს და უმთავრეს პარტნიორად ითვლება, აგრეთვე სხვადასხვა იტალიურ ფირმასთან. სთავაზობს მათ ტანსაცმელს მათივე მოთხოვნების შესაბამისად პარტნიორთა მიერ შემოთავაზებული მასალითა და ფურნიტურით. ფ-კა, უცხოური დაკვეთების გარდა, უშვებს (2011-იდან) ტანსაცმელს ადგილ. ბაზრისათვის. პროდუქციის რეალიზაცია ხდება ფ-კის ტერიტორიაზე არსებულ და თბილისში გახსნილ საფირმო მაღაზიებში.

ლ. აბრამიშვილი
